

Statut regionalnog kluba IPA Unsko-sanskog kantona

Na temelju odredbe člana 12. i 14. Zakona o udruženjima i fondacijama (Sl. Novine FBiH br. 45/02, u nastavku: Zakon), osnivačka Skupština Regionalnog kluba **IPA Unsko-sanskog kantona**, održana dana 08.11.2018. godine u Bihaću, donosi

S T A T U T REGIONALNOG KLUBA IPA UNSKO-SANSKOG KANTONA

GLAVA I.

OPĆE ODREDBE

Član 1.

Odredbama ovog Statuta uređuje se: naziv i sjedište Udruženja; svojstvo i zastupanje; ciljevi; djelatnosti kojima se ostvaruju ciljevi; ostvarivanje javnosti rada Udruženja; članstvo i članarina; prava, obveze i disciplinsku odgovornost članova; ustrojstvo i tijela Udruženja, njihov sastav, način njihova djelovanja, način odlučivanja, uvjeti i način izbora i opoziva, trajanje mandata i odgovornosti članova, ostvarivanje unutarnjeg nadzora; imovina i raspolaganje mogućom dobiti; prestanak rada i postupak s imovinom u slučaju prestanka.

Član 2.

U Regionalnom klubu IPA Unsko-sanskog kantona se osigurava zajednički rad, odlučivanje, odgovornost, te ravnopravnost članova u ostvarivanju njihovih prava, dužnosti odgovornosti utvrđenih Statutom i Zakonom bez obzira na funkciju, rang, jezik, rasu, religiju ili životni nazor.

GLAVA II.

NAZIV I SJEDIŠTE UDRUŽENJA

Član 3.

Puni naziv Udruženja glasi: "Regionalni klub IPA Unsko-sanskog kantona" (u daljnjem tekstu Regionalni klub).

Skraćeni naziv Regionalnog kluba je RK IPA USK.

Sjedište Regionalnog kluba je u Bihaću, Ulica 5. korpusa H-5/4.

Član 4.

Simbol Regionalnog kluba je međunarodni znak IPA-e slijedećeg opisa: u sredini se nalazi globus s označenim kontinentima crvene i morem plave boje, okružen pojasom plave boje, u kojem žutim slovima piše "**INTERNATIONAL POLICE ASSOCIATION**". Globus ima meridijane i paralele, u pozadini globusa nalazi se osmerokutna zvijezda, lijevo i desno se nalazi zlatni klas koji u donjem dijelu povezuje vinjeta s natpisom "**SERVO PER AMIKECO**". U gornjem dijelu klasove spaja natpis Regionalni klub **IPA Unsko-sanskog kantona**.

Simbol je zaštićen međunarodnim autorskim pravom, (c) by IPA 1974.

Član 5.

Regionalni klub ima pečat okruglog oblika promjera 35 mm. Sačinjava ga međunarodni simbol IPA-e s natpisom "**INTERNATIONAL POLICE ASSOCIATION**" koji okružuje globus svijeta s osmerokutnom zvijezdom. U donjem dijelu se nalazi široka crta s natpisom "**SERVO PER AMIKECO**", ispod kojeg je natpis "**Regionalni klub IPA Unsko-sanskog kantona**".

Član 6.

Rad Regionalnog kluba je javan. Skupština Regionalnog kluba može odlučiti da će se sjednice, odnosno rasprave u pojedinim tačkama dnevnog reda održati bez prisustva javnosti.

Javnost rada osigurava se i ostvaruje pravodobnim i istinitim obavještanjem članstva Regionalnog kluba putem sredstava javnog informisanja, IPA obavijesnih letaka i internih IPA glasila.

Predstavnici sredstava javnog informisanja mogu prisustvovati sjednicama tijela upravljanja Udruženja i obavještavati javnost o radu tih tijela, ukoliko su zaprimili poziv za rad sjednice tijela upravljanja.

Radi što potpunijeg ostvarivanja javnosti rada, Regionalni klub može izdavati svoje glasilo u skladu s propisima o javnom informiranju. Odluku o izdavanju glasila donosi Upravni odbor Regionalnog kluba.

Regionalni klub po potrebi izdaje i druga sredstva javnog informiranja (periodične publikacije, biltene, plakate i sl.) sukladno propisima o izdavačkoj djelatnosti.

GLAVA III.

SVOJSTVO I ZASTUPANJE

Član 7.

Regionalni klub **IPA Unsko-sanskog kantona** djeluje u okviru IPA sekcije Bosne i Hercegovine, kao stalne članice međunarodne organizacije **INTERNATIONAL POLICE ASSOCIATION**.

Odredbe ovog Statuta usklađene su s međunarodnim Statutom IPA-e, i prilagođene za područje djelovanja Udruženja s pravnim propisima Bosne i Hercegovine.

Član 8.

Radi uspješnijeg ostvarivanja vlastitih interesa Regionalni klub može surađivati s drugim odgovarajućim udruženjima i organizacijama u BiH i inozemstvu, u skladu sa Zakonom.

Član 9.

U ostvarivanju ciljeva i zadataka utvrđenih ovim Statutom Regionalni klub djeluje samostalno u skladu sa Zakonom.

Političko djelovanje u okviru Regionalnog kluba je zabranjeno.

Član 10.

Regionalni klub će biti upisan u registar udruženja pri nadležnom tijelu uprave Unsko-sanskog kantona.

Član 11.

Regionalni klub je pravna osoba, shodno zakonu.

Član 12.

Regionalni klub djeluje na području Unsko-sanskog kantona.

Član 13.

Regionalni klub predstavljaju i zastupaju predsjednik i sekretar Regionalnog kluba.

GLAVA IV.

CILJEVI I DJELATNOSTI UDRUŽENJA

Član 14.

Regionalni klub je udruženje građana u koji se slobodno i dobrovoljno učlanjuju aktivni i umirovljeni pripadnici agencija za sprovođenje zakona, sa sjedištem na području Unsko-sanskog kantona, bez razlike s obzirom na rang, spol, rasu, boju, jezik ili vjeroispovijest.

Svrha postojanja Regionalnog kluba je stvoriti prijateljske veze i promicati međunarodnu suradnju.

Regionalni klub je predan principima određenima Univerzalnom deklaracijom o ljudskim pravima usvojenom od Ujedinjenih naroda 1948. godine.

Ciljevi uključuju razvoj kulturnih odnosa među članovima, proširenje njihova opšteg znanja, te razmjenu stručnog iskustva. Nadalje, pokušava njegovati uzajamnu pomoć u društvenoj sferi i doprinijeti, u okviru svojih mogućnosti, mirnom suživotu među narodima i očuvanju svjetskog mira.

Član 15.

Da bi ostvario svoje ciljeve, Regionalni klub obavlja slijedeće djelatnosti:

- izmjenjuje iskustva s područja policijskog djelovanja u Bosni i Hercegovini i na međunarodnoj razini u obliku savjetovanja, predavanja, seminara, kongresa, tribina i drugih stručnih skupova,
- organizira izvedbe studijskih i drugih putovanja u cilju strukovnog povezivanja, te stručnog i profesionalnog usavršavanja članova,
- surađuje s drugim istovrsnim i sličnim udruženjima i organizacijama u inozemstvu i svim organizacijama koje podupiru rad Regionalnog kluba,
- omogućuje međusobne susrete Regionalnih klubova i Sekcije s drugim Sekcijama IPA-e na međunarodnoj razini,
- skrbi za širenje stručnih znanja putem domaćeg i stranog policijskog djelovanja,
- izdaje stručne brošure i stručne časopise sukladno Zakonu,
- organizira društvene i sportske priredbe na nacionalnoj i međunarodnoj razini,
- obavlja druge poslove koji doprinose ostvarivanju ciljeva osnivanja utvrđenih Statutom.

Regionalni klub u okvirima svoje djelatnosti brine o širenju sigurnosne kulture.

Aktivnost Regionalnog kluba temelji se na međusobnoj toleranciji i potpori među članovima, a cjelokupna djelatnost odvija se u duhu krilatice IPA-e: "**SERVO PER AMIKECO**" - Služiti kroz prijateljstvo.

GLAVA V.

ČLANOVI UDRUŽENJA, TE PRAVA I OBVEZE ČLANOVA

Član 16.

Članom Regionalnog kluba može postati svaki pripadnik policijskog tijela u BiH, te umirovljeni pripadnik policijskog tijela koji prihvaća ovaj Statut i Program regionalnog kluba IPA-e, ili onaj koji je najmanje proveo u radnom odnosu 5 godina u policijskim agencijama, a časno je otpušten iz istih.

Članovi udruženja su ravnopravni u svakom pogledu.

Članom Regionalnog kluba postaje se dobrovoljnim pristupanjem istom, potpisom pristupnice, te plaćanjem pristupnine i godišnje članarine.

Svaki član Regionalnog kluba ima iskaznicu, čiji oblik propisuje IPA sekcija BiH.

Član 17.

Članstvo u Regionalnom klubu može biti redovno, počasno i pridruženo.

Redovni članovi su osobe iz člana 16. ovog Statuta.

Počasnim članom postaje osoba koja ima iznimne zasluge za razvoj i djelovanje Regionalnog kluba. O dodjeli titule počasnog člana odlučuje Upravni odbor Regionalnog kluba na prijedlog predsjednika ili sekretara Regionalnog kluba.

Počasnim članom može postati i svaka pravna osoba ili građanin, koji svojim djelovanjem pomaže u ostvarivanju ciljeva i djelatnosti Regionalnog kluba, te prihvaća odredbe ovog Statuta.

Pridruženim članom može postati svaka osoba iz člana 16. ovog Statuta, koja nije državljanin Bosne i Hercegovine, a koja ima stalni ili privremeni boravak u BiH. Odluku o prijemu u članstvo donosi Upravni odbor.

Član 18.

Regionalni klub pod jednakim uvjetima ima pravo koristiti opremu i sredstva IPA Sekcije Bosne i Hercegovine, kao i sve pogodnosti koje se za članove utvrđuju u okviru Sekcije.

Dužnost Regionalnog kluba je:

- provoditi zadaće i ciljeve Sekcije i svjetske odnosno regionalne IPA organizacije,
- poštivati pravila Sekcije i odluke tijela Sekcije,
- sudržavati se od aktivnosti i djelatnosti koje bi mogle štetiti ugledu i ciljevima Sekcije,
- nadoknaditi troškove članarine u rokovima predviđenim odlukom Upravnog odbora Sekcije.

Član 19.

Članovi Regionalnog kluba imaju neposredno i posredno izborno pravo.

Neposredno izborno pravo ostvaruje se na sjednicama Skupštine Regionalnog kluba.

Posredno izborno pravo ostvaruje se posredstvom izabраниh predstavnika u tijelima upravljanja Regionalnog kluba.

Svaki član ima pravo nositi i koristiti simbol IPA-e u skladu s ciljevima Regionalnog kluba.

Član 20.

Članovi Regionalnog kluba imaju pravo sudjelovati i odlučivati o njezinu radu, birati i biti birani u tijela Regionalnog kluba, biti izvješteni o njezinu djelovanju, davati ocjene i mišljenja o radu Regionalnog kluba, davati prijedloge i poticati njezin rad.

Pravo je svakog člana Regionalnog kluba da sudjeluje u radu seminara i predavanja koje Regionalni klub bude organizirao.

Član 21.

Članstvo u Regionalnom klubu prestaje:

- smrću člana,
- prestankom djelovanja Regionalnog kluba,
- pisanom izjavom o istupanju iz članstva,
- isključenjem iz članstva,
- gubitkom statusa iz člana 16. ovog Statuta.

Član 22.

Član Regionalnog kluba može biti isključen iz članstva, ako svojim djelovanjem šteti ugledu Regionalnog kluba ili djeluje protivno odredbama Statuta, uključujući i diskriminaciju članova unutar Kluba, ne sudjeluje u aktivnostima koje organizuje Regionalni klub odnosno više od jedne godine ne podmiri iznos članarine.

Oblici odgovornosti članova su:

1. Javna kritika za neizvršavanje obaveza kojima nije narušen ugled Udruženja ili nije nastala znatna materijalna ili nematerijalna šteta,

2. Opomena pred isključenje za višekratno neizvršavanje dužnosti i obaveza,

3. Isključenje iz Udruženja u slučaju da član povrijedi statutarne odredbe ili ugrozi ugled Udruženja, odnosno nanese veću materijalnu ili nematerijalnu štetu.

Prijedlog za isključenje može podnijeti Upravni odbor Regionalnog kluba pisanim putem Suda časti Regionalnog kluba kao prvostupnom tijelu.

Na odluku Suda časti Regionalnog kluba, član ima pravo podnijeti prigovor o kojem odlučuje Skupština Regionalnog kluba.

Od trenutka pokretanja postupka za isključenje član je dužan iskaznicu i značku IPA-e privremeno predati predsjedniku ili sekretaru regionalnog kluba.

Od trenutka pokretanja postupka do donošenja odluke, prava članstva miruju.

GLAVA VI.

USTROJSTVO I TIJELA UDRUŽENJA

Član 23.

Regionalni klub je udruženje koja pored središnjih tijela ima i svoje ustrojstvene oblike, bez svojstva pravne osobe, na području postrojbi policijskog tijela ili policijskih stanica, koje djeluju sukladno ovom Statutu.

Odluku o osnivanju ustrojstvenih oblika donosi Skupština.

Član 24.

Tijela upravljanja Regionalnog kluba su Skupština, Upravni odbor, Nadzorni odbor, Sud časti, Predsjednik kluba.

Skupština Regionalnog kluba

Član 25.

Skupština je najviše tijelo Regionalnog kluba.

Skupštinu čini 25 redovnih članova Regionalnog kluba koji će biti ravnomjerno zastupljeni u pogledu agencijskog i teritorijalnog nivoa pristupanja, te će članovi iz svake policijske agencije predlagati svoje kandidate za Skupštinu, a koje će usvajati Upravni odbor Udruženja.

Skupština odlučuje o svim bitnim pitanjima za djelovanje Regionalnog kluba, te svim pitanjima vezanim za utvrđivanje i provođenje ciljeva i zadataka Regionalnog kluba.

Skupština Regionalnog kluba saziva se po ukazanoj potrebi, najmanje jednom godišnje, a saziva je predsjednik Regionalnog kluba na osnovu odluke Upravnog odbora.

Mandat članova Skupštine Regionalnog kluba je četiri (4) godine s mogućnošću reizbora.

Član 26.

Izvanredna Skupština saziva se na zahtjev najmanje jedne polovine ukupnog broja članova, s time da se odmah mora predložiti dnevni red.

Upravni odbor je dužan sazvati izvanrednu Skupštinu u roku od trideset (30) dana od dana podnošenja zahtjeva, a ukoliko to ne učini, izvanrednu Skupštinu mogu sazvati predlagatelji.

Na Izvanrednoj Skupštini raspravlja se samo o predloženom dnevnom redu.

Član 27.

Radom Skupštine rukovodi predsjednik koji dostavlja dnevni red najmanje 10 (deset) dana prije održavanja Skupštine.

U slučaju spriječenosti predsjednika radom skupštine rukovodi sekretar kluba.

Skupština može pravovaljano odlučivati, ukoliko je istoj prisutno više od polovice članova Skupštine Regionalnog kluba.

Ako skupštini nije prisutna natpolovična većina članova Skupštine Regionalnog kluba, skupština se odgađa na pola sata. Nakon toga skupština pravovaljano odlučuje, ako je prisutno najmanje 50 % članova.

Skupština odlučuje većinom glasova članova na Skupštini Regionalnog kluba.

Odluke o promjeni Statuta, Poslovnika o radu Skupštine i prestanku rada Regionalnog kluba Skupština donosi dvotrećinskom većinom prisutnih članova Skupštine.

Član 28.

Poziv za održavanje Skupštine mora sadržavati podatke o mjestu i vremenu održavanja Skupštine, te prijedlog dnevnog reda. Uz poziv dostavljaju se i materijali o pitanjima koja su na dnevnom redu.

Član 29.

Skupština Regionalnog kluba:

- donosi, mijenja i dopunjuje Statut,
- donosi, mijenja i dopunjuje Poslovnik o radu Skupštine,
- donosi druge opće akte potrebne za djelovanje Regionalnog kluba,
- bira i razrješuje predsjednika Regionalnog kluba i sekretara Regionalnog kluba,
- bira i razrješuje članove Upravnog odbora, Nadzornog odbora te Suda časti,
- razmatra izvještaj o radu Kluba,
- odlučuje o sudjelovanju Regionalnog kluba u radu nacionalnih i inozemnih organizacija,
- odlučuje o suradnji s drugim organizacijama,
- rješava i odlučuje o prijedlozima i prigovorima članova Regionalnog kluba u drugom stupnju,
- odlučuje o prestanku rada Regionalnog kluba.

Mandat predsjednika, sekretara, članova Upravnog odbora, Nadzornog odbora i Suda časti traje četiri godine.

Član 30.

Skupština Regionalnog kluba može opozvati i razriješiti članove Upravnog odbora, Nadzornog odbora, Suda časti i Predsjednika prije isteka vremena na koje su izabrani, ako prekorače svoja ovlaštenja ili ne izvršavaju savjesno povjerene im obveze, te ako ne postupaju sukladno ovom Statutu.

Ako razrješava pojedine članove Upravnog odbora ili Predsjednika, sekretara ili blagajnika, Skupština tada bira nove članove Upravnog odbora, odnosno novog Predsjednika na vrijeme do isteka mandata u čiji su sastav birani.

Razrješava li cijeli Upravni odbor, Skupština tada bira novi do isteka mandata.

Svaki član Upravnog odbora, Nadzornog odbora, Suda časti i Predsjednik Regionalnog kluba može zatražiti svoje razrješenje prije isteka mandata na koji je izabran.

Upravni odbor

Član 31.

Upravni odbor je operativno izvršno tijelo Regionalnog kluba.

Član 32.

Upravni odbor ima pet (5) članova.

Upravni odbor čine predsjednik Upravnog odbora, sekretar, blagajnik i dva člana Upravnog odbora.

Pri rješavanju pojedinih slučajeva u svom radu Upravni odbor poziva i druge članove i voditelje podsekcija Regionalnog kluba.

Član 33.

Mandat članova Upravnog odbora je četiri (4) godine s mogućnošću reizbora. Za svoj rad Upravni odbor je odgovoran Skupštini Regionalnog kluba.

Svaki član Upravnog odbora može zatražiti svoje razrješenje prije isteka mandata na koji je izabran.

Član 34.

Upravni odbor Regionalnog kluba:

- vodi rad Regionalnog kluba između dvije Skupštine,
- utvrđuje prijedlog, izmjene i dopune Statuta,
- donosi financijski plan i izrađuje završni račun,
- podnosi Skupštini izvještaj o radu,
- odlučuje o visini članarine,
- brine se o informiranju članstva i javnosti,
- odlučuje o prijemu u počasno članstvo,
- osniva odbore, komisije i druga tijela koja pomažu ostvarivanju ciljeva Regionalnog kluba,
- zastupa Regionalni klub na nacionalnoj i međunarodnoj razini.
- priprema program rada i brine o njegovoj realizaciji, te predlaže provedbu istog,

- prethodno raspravlja o određenim pitanjima iz nadležnosti Skupštine Regionalnog kluba,
- obavlja sve druge aktivnosti koje mu Skupština stavi u nadležnost,
- odlučuje o drugim pitanjima od značaja za rad Regionalnog kluba utvrđenim ovim Statutom koja nisu stavljena u nadležnost drugih tijela.

Član 35.

Sjednice Upravnog odbora održavaju se prema potrebi, najmanje svaka 3 mjeseca.

Sjednica se može održati ako je prisutna većina članova Upravnog odbora, a pravovaljane odluke donose se većinom glasova prisutnih članova Upravnog odbora.

Sjednice Upravnog odbora vodi predsjednik Upravnog odbora.

U slučaju odsutnosti predsjednika sjednicu vodi sekretar Regionalnog kluba.

Član 36.

Predsjednik Upravnog odbora predstavlja Regionalni klub u zemlji i inozemstvu, te vodi rad Upravnog odbora. U njegovom odsustvu Regionalni klub predstavlja sekretar ili drugi član Upravnog odbora kojega imenuje predsjednik.

Mandat predsjednika i sekretara traje četiri (4) godine, sa mogućnošću da budu ponovo birani.

Upravni odbor donosi odluke većinom glasova svih članova. U slučaju jednakog broja glasova odlučujući je glas Predsjednika Regionalnog kluba.

Predsjednik Regionalnog kluba je član i predsjednik Upravnog odbora.

Sekretar Regionalnog kluba je član i sekretar Upravnog odbora i brine se o informiranju članstva.

Pismena o poslovanju potpisuju predsjednik i sekretar.

Nadzorni odbor

Član 37.

Nadzorni odbor Regionalnog kluba čine predsjednik i dva člana, koje za razdoblje od četiri (4) godine bira Skupština Regionalnog kluba, iz redova članova Regionalnog kluba.

Za vrijeme mandata članovi Nadzornog odbora ne smiju imati drugih funkcija u Regionalnom klubu.

Nadzorni odbor je zadužen za nadzor nad poslovanjem Regionalnog kluba i nad financijskim stanjem Regionalnog kluba.

Nadzorni odbor ima pravo uvida u sve poslovne i financijske spise Regionalnog kluba. O izvršenom uvidu obvezno se sastavlja zapisnik, a istom nazoče najmanje dva (2) člana Nadzornog odbora.

O obavljenom uvidu izvješćuje se Upravni odbor i Skupština Regionalnog kluba.

Nadzorni odbor u hitnim slučajevima, a u vezi poslovanja i financijskog stanja Regionalnog kluba, ima pravo sazvati sjednicu Upravnog odbora koja mora biti sazvana u roku od mjesec dana od postavljanja zahtjeva.

Nadzorni odbor za svoj rad odgovoran je Skupštini Regionalnog kluba.

Sud časti

Član 38.

Sud časti čine predsjednik suda i dva člana Regionalnog kluba.

Članovi Suda časti (u daljnjem tekstu: Sud) su izabrani od strane Skupštine Regionalnog kluba, iz redova članstva regionalnog kluba.

Članovima Suda mandat traje četiri (4) godine uz mogućnost reizbora.

Za vrijeme mandata članovi Suda ne smiju imati drugih funkcija u Regionalnom klubu.

Za svoj rad Sud je odgovoran Skupštini.

Član 39.

Sud rješava sporove između članova kod kršenja Statuta i pravila Regionalnog kluba, neizvršavanja odluka i aktivnosti koje štete ugledu IPA-e.

U postupcima u vezi disciplinske odgovornosti članova Regionalnog kluba odgovarajući se primjenjuju odredbe Zakona o općem upravnom postupku i drugih propisa.

Član 40.

Sud može izreći slijedeće mjere:

- opomenu,
- javnu opomenu,
- isključenje iz Regionalnog kluba.

O izrečenoj mjeri izdaje se rješenje sukladno odredbama Zakona o općem upravnom postupku. Član Regionalnog kluba na kojeg je rješenje naslovljeno može na isto uložiti prigovor o kojem odlučuje Skupština Regionalnog kluba.

GLAVA VII.

Materijalno i finansijsko poslovanje Udruženja

Član 41.

Imovinu Regionalnog kluba čine prihodi koje ista ostvaruje od: članarine, dobrovoljnih priloga, poklonjenih sredstava, subvencija i drugih prihoda.

Član 42.

Regionalni klub ima svoja materijalna, osnovna i obrtna sredstva.

Član 43.

Regionalni klub upravlja imovinom sukladno propisima o materijalnom i finansijskom poslovanju neprofitnih organizacija.

O svoj imovini Regionalnog kluba vodi se evidencija.

Za zakonitost finansijskog poslovanja odgovoran je blagajnik Regionalnog kluba.

Član 44.

Regionalni klub posluje putem žiro računa Regionalnog kluba pri ovlaštenoj organizaciji za obavljanje platnog prometa.

Član 45.

Financijske i materijalne liste supotpisuju predsjednik i blagajnik ili osobe koje je za to ovlastio Upravni odbor.

Izvršenje finansijskih odluka Regionalnog kluba određuje predsjednik Regionalnog kluba, a u njegovoj odsutnosti zamjenik predsjednika, sekretar ili jedan ovlašteni član.

Član 46.

Novčana sredstva mogu se upotrijebiti sukladno prihvaćenom finansijskom planu i programu rada Regionalnog kluba.

Upotrebu novčanih sredstava jednom godišnje kontrolira Nadzorni odbor.

Izveštaj o završenoj poslovnoj godini - završni račun - plan i program finansijskog plana za naredno razdoblje donosi Upravni odbor Regionalnog kluba.

GLAVA VIII.

PRESTANAK POSTOJANJA UDRUŽENJA

Član 47.

Regionalni klub prestaje postojati odlukom skupštine i u slučajevima propisanim zakonom.

Član 48.

Po prestanku postojanja Regionalnog kluba, sredstva i imovina u vlasništvu Regionalnog kluba prenamjenjuju se shodno zakonskim odredbama koji regulišu to pitanje.

Odluka o tome donosi se na posljednjoj Skupštini Regionalnog kluba ili sjednici Upravnog odbora, ukoliko nije moguće sazvati Skupštinu.

GLAVA IX.

STATUT I DRUGI OPĆI AKTI

Član 49.

Statut je temeljni opći akt Regionalnog kluba i svi drugi opći akti moraju biti u skladu s odredbama Statuta.

Nacrt izmjena i dopuna Statuta, priprema i utvrđuje Upravni odbor Regionalnog kluba i upućuje ga na raspravu članovima Skupštine.

Upravni odbor Regionalnog kluba razmatra primjedbe i prijedloge koji su dani u raspravi, zauzima stavove o njima i utvrđuje Prijedlog statuta.

Član 50.

Tumačenje odredaba Statuta daje Skupština Regionalnog kluba.

Član 51.

Sva unutarnja pitanja Regionalnog kluba, kao i druga pitanja koja nisu uređena Statutom, a zahtijevaju detaljnu razradu, bit će uređena opštim aktima koje donosi Skupština Regionalnog kluba, a na prijedlog Upravnog odbora.

Opšti akti Regionalnog kluba donose se i mijenjaju analogno postupku donošenja i izmjene Statuta, izuzev obveze dostavljanja prijedloga opšteg akta članovima Regionalnog kluba.

GLAVA X.

PRIJELAZNE I ZAVRŠNE ODREDBE

Član 52.

Upravni odbor Regionalnog kluba može svojom odlukom dodijeliti priznanje i nagradu pojedincima, tijelima i pravnim osobama za uspješno provođenje programa rada, ostvarivanje inovacija u području policijske struke. Isto tako u pisanom obliku predlaže pojedince, tijela i pravne osobe za godišnje nagrade IPA-e.

Član 53.

Statut potpisuje imenom, prezimenom, oznakom svojstva i vlastoručnim potpisom predsjednik kluba.

Član 54.

Svi opšti akti donijet će se u roku od jedne (1) godine od dana upisa u registar udruženja.

Član 55.

Ovaj Statut stupa na snagu s danom donošenja, a primjenjuje se s danom upisa u registar udruženja pri nadležnom kantonalnom organu Uprave.

U Bihaću, 08.11.2018. godine

*Predsjednik
Regionalnog Kluba*

Mr. sci. Šero Družić